

宋板孟浩然集




上册

孟浩然集序

宜城王士源

孟浩然字浩然襄陽人也骨貌淑清風神散朗救患釋紛以立義表灌蔬藝竹以交游之中通脫傾蓋機警無匿學不為儒務掇菁藻文不按古匠心獨妙五言詩天下稱其盡美矣間游秘省秋月新霽諸英華賦詩作會浩然句曰微雲淡河漢踈雨滴梧桐舉坐嗟其清絕咸閣筆不復為繼丞相范陽張



九齡侍御史京兆王維尚書侍郎河東裴朮
范陽盧僎大理評事河東裴揔華陰太守鄭
倩之守河南獨孤策率與浩然為忘形之交
山南採訪使本郡守昌黎韓朝宗謂浩然問
代清律寘諸周行必詠穆如之頌因入秦與
偕行先揚于朝與期約日引謁及期浩然會
寮友文酒講好甚適或曰子與韓公預諾而
怠之無乃不可乎浩然叱曰僕已飲矣身行
樂耳遑恤其他遂畢席不赴由是間罷既而

浩然亦不之悔也其好樂忘名如此士源作
時嘗筆讚之曰導漾挺靈寔生楚英浩然清
發亦其自名開元二十八年王昌齡游襄陽
時浩然疾疔發背且愈相得歡甚浪情宴譔
食鮮疾動終於治城南園年五十有二子曰
儀甫浩然文不為仕佇興而作故或遲行不
為飾動以求真故似誕遊不為利期以放性
故常貧名不繼於選部聚不盈於擔石雖屢
空不給而自若也士源幼好名山行年十八

首事陵山踐止恒嶽咨求通玄丈人又過蘇
門問道隱者元知運太行採藥經王屋小有
洞太白習隱訣終南修亢倉子九篇天寶四
載徂夏詔書徵謁京邑與冢臣八座討論山
林之士齋至始知浩然物故嗟哉未祿於代
史不必書安可哲蹤妙韻從此而絕故詳問
文者隨述所論美行嘉聞十不紀一浩然凡
所屬綴就輒毀弃無復編錄常自歎爲文不
逮意也流落既多篇章散逸鄉里購採不有

其半敷求四方徃徃而獲既無他事爲之傳
次遂使海內衣冠搢紳經襄陽思覩其文蓋
有不備見而去惜哉今集其詩二百一十八
首分爲三卷詩或缺逸未成而製思清美及
他人酬贈咸錄次而不弃耳

重序

宜城王士源者藻思清遠深鑒文理常遊山水不在人間著元倉子數篇傳之於代余父在集賢常與諸學士命此子不可得見天寶中忽獲浩然文集乃士源為之序傳詞理卓絕吟諷忘疲書寫不一紙墨薄弱昔虞坂之上逸駕與駑駘俱疲吳竈之中孤桐與樵蘇共爨遇伯樂與伯喈遂騰聲於千古此詩若不過王君乃十數張故紙耳然則王君之清

鑒豈減孫蔡而已哉余今繕寫增其條目復
貴士源之清才敢重述於卷首謹將此本送
上秘府庶久而不泯傳芳無窮天寶九載正
月初三日特進行太常卿禮儀使集賢院修
撰上柱國沛國郡開國公韋滔叙

孟浩然集卷第一



五言古詩

尋香山湛上人

朝游訪名山山遠在空翠氛氲亘百里日入
行始至谷口聞鐘聲林端識香氣杖策尋故
人解鞍暫停騎石門殊豁險篁徑轉森邃法
侶欣相逢清談曉不寐平生慕真隱累日探
竒異野老朝入田山僧暮歸寺松泉多清響
苔壁饒古意願言接此山身世兩相棄

晚泊潯陽望香爐峯

掛席幾千里名山都未逢泊舟潯陽郭始見
香爐峯嘗讀遠公傳永懷塵外蹤東隣精舍
近日暮空聞鍾

雲門寺西六七里聞符公蘭若最幽
與薛八同往

謂予獨迷方逢子亦在野結交指松柏問法
尋蘭若小溪劣容舟恠石屢驚馬所居最幽
絕所住皆靜者雲簇興座隅天空落階下作

密篠夾路旁清泉流舍下上人亦何閑塵念俱已捨四禪
合真如一切是虛假願承甘露潤喜得惠風
灑依止此山門誰能效丘也

宿天台桐栢觀

海汎信風帆夕宿逗雲島緬尋滄洲趣近愛
赤城好捫蘿亦踐苔輟棹恣窮討息陰憇桐
栢采秀尋芝草鶴唳清露垂鷄鳴信潮早願
言解纓紱從此去煩惱高步陵四壁玄蹤得
三老紛吾遠遊意樂彼長生道日夕望三山

雲濤空浩浩

峴潭作

石潭傍隈隩沙岸曉黃綠試垂竹竿釣果得
槎頭鱸美人騁金錯織手膾紅鮮因謝陸內
史尊羨何足傳

題終南翠微寺空上人房

翠微終南裏雨後宜返照閉關久沉冥杖策
一登眺遂造幽人室始知靜者妙儒道雖異
門雲林頗同調兩心喜相得畢景共談笑暝

還高窓眠時見遠山燒緬懷赤城標更憶臨
海嶠風泉有清音何必蘇門嘯

春初漢中漾舟

羊公峴山下一作漾舟神女漢皋曲雪罷冰

復開春潭千丈綠輕舟恣來往探翫無馱足
波影搖妓釵沙光逐人目傾杯魚鳥醉聯句
鶯花續良會難再逢日入須秉燭

宿業師山房待丁公不至

夕陽度西嶺群壑倏已暝松月生夜涼風泉

滿清聽樵人歸欲盡煙鳥棲初定之子期宿
來孤琴候蘿逕

耶溪泛舟

落景餘清輝輕橈弄溪渚澄明愛水物臨泛
何容與白首垂釣翁新粧浣紗女相看似相
識脉脉不得語

彭蠡湖中望廬山

太虛生月暈舟子知天風掛席候明發眇望
平湖中中流見匡阜勢壓九江雄黯黯凝黛

色崢嶸當曉空香爐初上日瀑水噴成虹久
欲追尚子况茲懷遠公我來限于後未暇息
微躬淮海途將半星霜歲欲窮寄言巖棲者
畢趣當來同

登鹿門山懷古

清曉因興來乘流越江峴沙禽近方識浦樹
遠莫辨漸到鹿門山山明翠微淺巖潭多屈
曲舟楫屢迴轉昔聞龐德公採藥遂不返金
澗養芝朮石牀卧苔蘚紛吾感耆舊結攬事

攀踐隱迹今尚存高風邈已遠白雲何時去
丹桂空偃蹇探討意未窮迴艫夕陽晚

遊明禪師西蘭若

西山多竒狀秀出倚前楹一作西山饒石亭
嶺翠疑削成
亭午收彩翠夕陽照分明吾師住其下禪坐諸
無生結廬就嵌窟剪竹通徑行談空對樵叟
授法與山精日暮方辭去田園歸冶城

聽鄭五情彈琴

阮籍推名飲清風坐竹林半酣下衫袖拂拭

龍唇琴一杯彈一曲不覺夕陽沉予意在山
水聞之諧夙心

從張丞相遊紀南城獵戲贈裴迪張

參軍

從禽非吾樂不好雲夢田歲暮登城望偏令
鄉思懸公卿有幾子輕騎何翩翩世祿金張
貴官曹幕府連順時行殺氣飛刃爭割鮮十
里屆賓館徵聲匝妓筵高標迴落日平楚壓
芳煙何意狂歌客從公亦在旗

登望楚山最高頂

山水觀形勝襄陽美會稽最高惟望楚曾朱
一攀躋石壁疑削成衆山比全低晴明試登
陟目極無端倪雲夢掌中小武陵花處迷暝
還歸騎下蘿月在深溪

疾愈過龍泉精舍呈易業二上人

停午聞山鐘起行散愁寂尋林採芝去轉谷
松蘿密旁見精舍開長廊飯僧畢石渠流雪
水金子曜霜橘竹房思舊遊過憇終永日入

洞窺石髓傍崖採蜂蜜日暮辭遠公虎溪相
送出

萬山潭

垂釣坐盤石水清心益閑魚行潭樹下猿掛
島藤間遊女昔解佩傳聞於此山求之不可
得公月棹歌還

與黃侍御北津泛舟

津無蛟龍患日夕常安流本欲避駉馬何知
同鷁舟豈伊今日幸曾是昔年遊莫奏琴中

鶴且隨波上鷗堤綠九里郭山面百城樓自
顧躬耕者才非管樂儔聞君薦草澤從此泛
滄洲

早梅

園中有早梅年例犯寒開少婦爭攀折將歸
插鏡臺猶言看不足更欲剪刀裁

襄陽旅泊寄閻九司戶

桂水通百越扁舟期曉發荆雲蔽三巴夕望
不見家襄王夢行雨才子謫長沙長沙饒瘴

癘胡爲久留滯久別思款顏承懽懷接袂接
袂杳無由徒增旅泊愁清猿不可聽泂月下
湘流

大堤行寄萬七

大堤行樂處車馬相馳突歲歲春草生踏青
二三月王孫挾珠彈遊女矜羅襪携手今莫
同江花爲誰發

還山贈湛禪師

幼聞無生理常欲觀此身心迹罕兼遂嶮崎

多在塵晚途歸舊壑偶與支公隣喜得林下
契共推席上珍念茲泛苦海方便示迷津導
以微妙法結為清淨因煩惱業頓捨山林情
轉殷朝來問疑義夕話得清真墨妙稱古絕
辭華驚世人禪房閉虛靜花藥連冬春平石
籍琴硯落泉灑衣巾欲知意冥滅朝夕海鷗
馴

秋登蘭山寄張五

北山白雲裏隱者自怡悅相望始登高心隨

鴈飛滅愁因薄暮起興是清秋發時見歸村
人平沙渡頭歇天邊樹若薺江畔舟如月何
當載酒來共醉重陽節

入峽寄弟

吾昔與汝輩讀書常閉門未嘗冒湍險豈顧
垂堂言自此歷江湖辛勤難具論往來行旅
弊開鑿禹功存壁立千峯峻滾流萬壑奔我
來凡幾宿無夕不聞猿浦上搖歸戀舟中失
夢魂淚沾明月峽心斷鶴鷺原離闕情難聚

秋深露易繁因君下南楚書此寄鄉園
登江中孤嶼贈白雲先生王迥

悠悠清江水水落沙嶼出迴潭石下深綠篠
岸傍密鮫人潛不見漁父歌自逸憶與君別
時泛舟如昨日夕陽開返照中坐興非一南
望鹿門山歸來恨相失

晚春卧病寄張八子容

南陌春將晚北窓猶卧病林園久不遊草木
一何盛狹逕花障迷閑庭竹掃淨翠羽戲蘭

茗頰鱗動荷柄念我平生好江鄉遠從政雲
山阻夢思衾枕勞感詠感詠復何爲同心恨
別離世途皆自媚流俗寡相知賈誼才空逸
安仁鬢欲絲遙情每東注奔晷復西馳常恐
填溝壑無由振羽儀窮通若有命欲向論中
推

書懷貽京邑故人

維先自鄒魯家世重儒風詩禮襲遺訓趨庭
紹末躬晝夜常自強詞賦頗亦工三十既成

立嗟吁命不通慈親向羸老喜懼在深衷甘
脆朝不足簞瓢夕屢空執鞭慕夫子捧檄懷
毛公感激遂彈冠安能守固窮當途訴知己
投刺匪求蒙秦楚邈離異翻飛何日同

遊雲門寺寄越府包戶曹徐起居

我行適諸越夢寐懷所懽久負獨往願今來
恣遊盤台嶺踐磴石耶溪斥林湍捨舟入香
界登閣憇旃壇晴山秦望近春水鏡湖寬遠
懷佇應接卑位徒勞安白雲日夕滯滄海去

來觀故國眇天末良朋在朝端遲爾同携手
何時方掛冠

宿揚子津寄潤州長山劉隱士

所思在夢寐欲往大江深日夕望京口煙波
愁我心心馳茅山洞目極楓樹林不見少微
隱星霜勞夜吟

示孟郊

蔓草蔽極野蘭芝結孤根衆音何其繁伯牙
獨不喧當時高深意舉世無能分鍾期一見

知山水千秋聞爾其保靜節薄俗徒云云

山中逢道士雲公

春餘草木繁耕種滿田園酌酒聊自勸農夫
安與言忽聞荆山子時出桃花源採樵過北
谷賣藥來西村村煙日云夕榛路有歸客杖
策前相逢依然是疇昔邂逅歡覲止殷勤叙
離隔謂予轉扶桑輕舉振六翮柰何偶昌運
獨見遺草澤旣笑接輿狂仍憐孔丘厄物情
趨勢利吾道貴閑寂偃息西山門庭罕人

迹何時還清溪從爾鍊丹液

歲暮海上作

仲尼旣已沒余亦浮于海昏見斗柄迴方知
歲星改虛舟任所適垂釣非有待爲問乘槎
人滄洲復何在

越中逢天台太子

仙穴逢羽人停艫向前拜問予涉風水何事
遠行邁登陸尋天台順流下吳會茲山夙所
尚安得聞靈恠上逼青天高俯臨滄海大鷄

鳴見日出每與神仙會來去赤城中道遙白
雲外莓苔異人間瀑布作空界福庭長不死
華頂舊稱最永懷從此遊何當濟所屆

自潯陽泛舟經海潮作

大江分九派淼漫成水鄉舟子乘利涉往來
過潯陽因之泛五湖流浪經三湘觀濤壯救
發弔屈痛沉湘魏闕心常在金門詔不忘遙
憐上林鴈冰泮已回翔

早發魚浦潭

東旭早光茫渚禽已驚聒卧聞漁浦口橈聲
暗相撥日出氣象分始知江路闊美人常晏
起照影弄流沫飲水畏驚猿祭魚時見獺舟
行自無悶況值晴景豁

經七里灘

予奉垂堂誠千金非所輕為多山水樂頻作
泛舟行五嶽追尚子三湘弔屈平湖經洞庭
闕江入新安清復聞嚴陵瀨乃在此川路疊
障數百里汭洄非一趣彩翠相氛氲別流亂

奔注釣磯平可坐苔磴滑難步
猿飲石下潭鳥還日邊樹
觀竒恨來晚倚棹惜將暮
揮手弄潺湲從茲洗塵慮

題長安主人壁

久廢南山田叨陪東閣賢
欲隨平子去猶未獻甘泉
枕席琴書滿寒帷遠岫連
我來如昨日庭樹忽鳴蟬
促織驚寒女秋風感長年
授衣當九月無褐竟誰憐

南歸北阻雪

我行滯宛許日夕望京豫
曠野莽茫茫鄉山在何處
孤煙村際起歸鴈天邊去
積雪覆平皋飢鷹捉寒兔
少年弄文墨屬意在章句
十上耻還家徘徊守歸路

將適天台留別臨安李主簿

枳棘君尚棲匏瓜吾豈繫
念離當夏首漂泊指炎裔
江海非墮遊田園失歸計
定山旣早發漁浦亦宵濟
泛泛隨波瀾行行任艫柁
故林日已遠群木坐成翳
羽人在丹丘吾亦從

此逝

送丁大鳳進士赴舉呈張九齡

吾觀鷦鷯賦君負王佐才惜無金張援十上空歸來棄置鄉園老翻飛羽翼催故人今在位岐路莫遲迴

送吳悅遊韶陽

五色憐鳳雛南飛適鷓鴣楚人不相識何處求椅梧去去日千里茫茫天一隅安能與斥鷃決起但槍榆

適越留別譙縣張主簿申屠少府

朝乘汴河流夕次譙縣界幸因西風吹得與故人會君學梅福隱余隨伯鸞邁別後能相思浮雲在吳會

送陳七赴西軍

吾觀非常者碌碌在目前君負鴻鵠志蹉跎書劔年一聞邊烽動萬里忽爭先余亦赴京國何當獻凱還

送從弟邕下第後歸會稽

疾風吹征帆，倏爾向空沒。千里去俄頃，三江坐超忽。向來共歡娛，日夕成楚越。落羽更分飛，誰能不驚骨。

送辛大之鄂渚不及

送君不相見，日暮獨愁緒。江上久徘徊，天邊迷處所。郡邑經樊鄧，雲山入嵩汝。蒲輪去漸遥，石徑徒延佇。

江上別流人

以我越鄉客，逢君謫居者。分飛黃鶴樓，流客

蒼梧野。驛使乘雲去，征帆沿溜下。不知從此分還袂，何時把。

夜登孔伯昭南樓時沈太清朱昇在座

誰家無風月，此地有琴樽。山水會稽郡，詩書孔氏門。再來值秋杪，高閣夜無喧。華燭罷燃蠟，清絃方奏鶡。沈生隱侯胤，朱子買臣孫。好我意不淺，登茲共話言。

宴鮑二宅

閑居枕清洛左右接人野門庭無雜賓車轍
多長者是時方正夏風物自瀟灑五日休沐
歸相攜竹林下開襟成歡趣對酌不能罷煙
暝棲鳥迷予將歸白社

與王昌齡宴黃十一

歸來卧青山常夢遊清都漆園有傲吏惠好
在招呼書幌神仙錄畫屏山海圖酌霞復對
此宛似入蓬壺

襄陽公宅飲

窈窕夕陽佳丰茸春色好欲覓淹留處無過
狹斜道綺席卷龍鬚香杯浮碼瑙北林積修
樹南池生別島手撥金翠花心迷玉芝草談
天光六義發論明三倒座非陳子驚門還魏
公掃榮辱應無間歡娛當共保

同張明府清鏡嘆

妾有盤龍鏡清光常晝發自從生塵埃有若
霧中月愁來或取照坐歎生白髮寄語邊塞
人如何久離別

夏日南亭懷辛子

山光忽西發池月漸東上散髮乘夜涼開軒
卧閑敞荷風送香氣竹露滴清響欲取鳴琴
彈恨無知音賞感此懷故人中宵勞夢想

秋宵月下懷

秋空明月懸光彩露霑濕驚鵲棲未定飛螢
捲簾入庭窻寒影踈鄰杵夜深急佳期曠何
許望望空佇立

歸澗園寄京邑舊遊

嘗讀高士傳最嘉陶徵君目覩田園趣自謂
羲皇人予復何為者悽悽徒問津中年廢丘
壑十上旅風塵忠欲事明主孝思侍老親歸
來當炎夏耕稼不及春扇枕北窻下採芝南
澗濱因聲謝朝列吾慕潁陽真

田家元日

昨夜斗迴北今朝歲起東我年已強仕無祿
尚憂農野老就耕去荷鋤隨牧童田家占氣
候共說此年豐

採樵作

採樵入深山山深水重疊橋崩卧槎擁路險
垂藤接日落伴將稀山風拂薜衣長歌負輕
策平野望煙歸

澗南即事貽皎上人

弊廬在郭外素產惟田園左右林野曠不聞
城市喧釣竿垂北澗樵唱入南軒書取幽棲
事將尋靜者言

家園卧病舊遊見尋

伏枕舊遊曠笙歌勞夢思平生重交結迨此
令人疑水室無暖氣火雲空赫曦隙駒不暫
駐日聽涼蟬悲壯圖哀未立斑白恨吾衰夫
子自南楚緬懷嵩汝斯

田家作

弊廬隔塵喧惟先養恬素卜鄰勞三逕植果
盈千樹粵余任推遷三十猶未遇書枕時將
晚丘園日空暮晨興自多懷晝坐常寡悟冲
天羨鴻鵠爭食羞雞鶩望斷金馬門勞歌採

樵路鄉曲無知己朝端乏親故誰能為楊雄
一薦甘泉賦

王迥見尋

歸閒日無事雲卧晝不起有客款柴扉自云
巢居子居閒好花木採藥來城市家在鹿門
山常遊澗澤水手持白羽扇脚步青芒履聞
道鶴書徵臨流還洗耳

庭橘

明發覽群物萬木何陰森凝霜漸漸水庭橘

似縣金女伴爭攀摘摘窺礙葉深並生憐共
帶相示感同心骨刺紅羅被香粘翠羽簪擎
來玉盤裏全勝在幽林

七言古詩

夜歸鹿門歌

山寺鳴鍾晝已昏漁梁渡頭爭渡喧人隨沙
岸向江村子亦乘舟歸鹿門鹿門月照開煙
樹忽到龐公樓隱處巖扉松徑長寂寥惟有
幽人自來去

和盧明府送鄭十三還京兼寄之
昔時風景登臨地今日衣冠送別筵
閑卧自傾彭澤酒思歸長望白雲天
洞庭一葉驚秋早溽落空嗟滯江島
寄語朝廷當世人何時重見長安道

送王七尉松滋得陽臺雲

君不見巫山神女作行雲
霏紅沓翠曉氛氲
嬋娟流入襄王夢
條忽還隨零雨分
空中飛去復飛來
朝朝暮暮下陽臺
愁君此去爲仙

尉便逐行雲去不廻

鸚鵡洲送王九遊江左

昔登江上黃鶴樓
遙愛江中鸚鵡洲
洲勢逶迤繞碧流
鴛鴦鸕鶿滿沙頭
沙頭日落沙磧長
金沙耀耀動飈光
舟人牽錦纜
浣女結羅裳
月明全見蘆花白
風起遙聞杜若香
君行采采莫相忘

高陽池送朱二

當昔襄陽雄盛時
山公常醉習家池
池邊釣

女目相隨粧成照影競來窺澄波淡淡芙蓉
發綠岸氍氍揚柳垂一朝物變人亦非四面
荒涼人住稀意氣豪華何處在空餘草露濕
羅衣此地朝來餞行者翻向此中牧征馬征
馬分飛日漸斜見此空爲人所嗟殷勤爲訪
桃源路予亦歸來松子家

孟浩然集卷第一

